

童山詩集
三



童山詩集

(三)

李調元撰

童山詩集卷十四

癸巳

正月朔高白雲先生由華亭令行取禮部主事來京先生本辛未庶常今仍還京職出和袁子才將心餘兩前輩詩見示

後堂不到幾多時。覲面方驚兩鬢絲。喜接春風容再坐。細聽夜雨話相知。袁宏文筆千秋仰。蔣詡高名二仲隨。怪道詞壇無敵手。曾同兩老角雄雌。

玉堂著作有先聲。不爲郎官始表名。人以內陞多代惜。官由外任轉偏榮。頭銜依舊冰條冷。行篋從新雀毳輕。自此相隨寧計日。祇愁熊軾促行旌。

送大兒朝礎歸蜀省母

自我再來京。攜汝共馳逐。豈惟畢婚事。兼妨失舊學。去春花朝前。親迎至平谷。納吉與納徵。禮繁費不足。固安借貸回。始得錦團簇。新婦初下車。肅拜喜有福。好合雖燕爾。晏安戒酖毒。幸我官未補。得以課汝讀。又恐責善離。延師致薄束。館塾不數武。朝夕得親督。先生吾年友。學富行亦樸。循循真善誘。日令苦孔卓。昨者書南來。汝母思汝酷。門戶強支撐。官租日催促。長女已及笄。悅竊誰屬目。况有婦未覲。顏色可如玉。

念汝有孝思。私向龜蓍卜。時覽身上衣。淚下不能縮。能不令汝歸。從汝心所欲。臨岐翻恨迫。繞庭自躑躅。人情思父母。畏愛各異腹。母慈多姑息。父嚴易鞭扑。豈謂性有他。實則恩同篤。總之望汝成。不殊饑待粟。汝少猶聰慧。嶄然見頭角。汝祖含飴弄。謂可大吾族。迄今已成人。雲鵬飛應速。如何似轅駒。櫪下仍蹉跎。不見東家子。潭潭公府宿。不見馬前卒。塵中走碌碌。汝今歸至家。賢師有兩叔。俱從吾指授。文體必不駁。汝於解裝時。疾用啟書簾。詩禮本家傳。選理要精熟。莫似昌黎兒。金銀字從俗。應如蘇叔黨。小坡名不辱。慈烏知反哺。老牛解舐犢。我今亦衰矣。世路懼顛覆。汝去誰扶持。加餐聊自勸。我雖身在外。官興淡於粥。日有山林想。何年遂初服。汝歸至醒園。爲訪舊松竹。薪木毀傷無。無寓人我屋。更爲告汝母。多多藏醺醑。待我歸來時。與客醉百斛。醉眠落花間。一任風吹覺。

江柳

春盡東風草色青。鵲啼日落客愁生。江流不斷暮烟合。一樹垂楊萬種情。

題醒園圖有感六首

車家山下老農夫。走上長安十二衢。昨夜鄉愁眠不得。呼燈起看醒園圖。自分途窮命裏該。君平不必太驚猜。虎頭不是封侯相。款段他時歸去來。每到花開躑躅頻。故山不見共誰春。生憎一幅桃源畫。付與漁郎去問津。再向天涯理客衣。回頭三十九年非。蓉溪春色花如錦。不爲蓴鱸也合歸。

煩惱詩人二月天。長安買醉日高眠。不須怪我朝參懶。夢裏醒園只枕邊。
故山茅屋傍雲龍。欲寄新詩再拆封。寄語兒童牆角外。明年添種幾株松。

送農部吳鑑南燾以刺史之蜀籌餉二首

蜀道青天上。青天我故鄉。夷民思向化。天子念循良。地本江爲錦。人稱國是香。君今從此去。遙聽說襲黃。
困獸窮猶鬪。王師網尙寬。三軍瀘水渡。六月雪山寒。聚米知形勢。飛芻戒飽餐。贈君腰下劍。好去斬樓蘭。

偕周松岑士孝遊白雲觀

駕言出西郊。共訪白雲觀。蒼蒼松柏林。金碧飛薨絢。聯步上月橋。龜拆池已旱。黃冠四五人。揖我下前殿。
爲指玉皇樓。巍巍插霄漢。雷聲忽滿梯。身已在天半。上界足官府。鞠躬未敢翫。座有黃庭經。不許偷眼看。
聞昔邱真人。於此丹砂煉。騎鶴已上昇。遺文貯空院。不知何方道。扃戶學靜幻。童子報客來。箕坐目猶眩。
試扣以元理。枝梧難吐嚙。不讀參同契。但云吾道貫。如此槁項坐。哀爾命如線。何時青鳥來。倘許我一見。

復偕周松岑遊吉氏園分韻得吉字

鬱鬱誰家園。有杏牆頭出。回首語周子。豈可掉臂失。相攜踰古垣。麥壠芽始茁。循牆不數跬。已達朱門室。
有樓半無窗。假山剩皆崒。鼯鼠拱相向。蝙蝠飛已疾。回視廊深處。花木尙稠密。忽逢駘背翁。乍見遠呵叱。
此是潭潭府。芻蕘尙無一。借問今何官。彼亦笑啞啞。云昔有將軍。縮頸諱名吉。炙手勢薰天。朝廷資輔弼。
車馬如流水。閭閻半梳柳。此亭破千家。費以巨萬鎰。何曾載酒來。已向邊方黜。祇餘看園丁。老病守蓬蓽。

我聞不勝歎。世事何倉卒。人生天地間。眞若禪中蟲。深縫爭來家。湯具乃恐悚。不如隨赤松。一問點石術。飛昇固不知。地仙尙可必。安能使百年。荏苒如箭疾。行當歸去來。爾言勿再述。

和松岑感懷韻

放蕩驩遊荷盛時。邇來形德總支離。醉如阮籍方長嘯。狂似王舒欲炙眉。偶到無聊還獨笑。儘教有恨莫回思。憑君努力加餐飯。休遣星星滿鬢絲。

和松岑留別韻二首

日高猶掩關。睡亦漸成癖。剝啄聞客來。司閹門始開。披衣起相見。備述遠行迹。不能事株守。爲時尚薪積。且當歸林泉。遶舍栽松柏。君歸吾亦歸。何須樹檠戟。人生慕銅符。大都染錢癖。使我二頃田。豈赴四門闢。奔走似牛磨。團團踏陳迹。究竟空蝸廬。粒粒未儲積。百歲終不大。有若巖生柏。莫作韓休輩。區區謀畫戟。

不寐二首

愁人渾不寐。徘徊待明發。何處涼風來。吹落一窗月。酒醒渴思茶。小奴呼不起。坐見膽瓶花。自落硯池裏。

與諸同年讌集大司農王白齋座師賜第二首

桃李花深晝閣東。笙歌如沸燭搖紅。門前倒屣來王粲。席上通家盡孔融。翡翠簾間敲夜雨。芙蓉鏡裏坐

春風自慚檣櫟全無用也。廁羣英上藥籠。當年鸞鳳集宮牆。盡羨鴛鴦班。早綴行喜氣。卽今輸捧檄。壯懷何日待烘堂。一天星宿披雲宴。萬里江湖落月梁。醉舞幾曾拘禮法。吾儕原是聖門狂。

送米曉亭錦同年之江西樂安任

連年輦下歎僑居。捧檄今朝樂有餘。地僻豈能終絆驥。水清定自不驚魚。鴈飛彭蠡三江外。人別燕山二月初。倘念京華舊詩侶。臨風好寄一行書。

閏二月二十二日得河南孟縣令魯同年鴻書云。礎兒已於初一日遣人送渡黃河。屈指十日可底家矣。作詩寄兒。

憶昨登程初著鞭。臨門送子百憂煎。幼年豈慣征鞍苦。此日欣聞故友憐。蜀棧知欹遮雨笠。孟津早遇順風船。老夫昨夜還堪歎。夢裏還家占汝先。

同年曹坦河南人得蕭縣令不之任卽引歸作詩留別卽次元韻

自昔還鄉說錦衣。胡爲四十便知非。不隨潘岳栽花去。却似陶潛爲菊歸。一刀何曾鷄試割。千鈞肯爲鼠張機。知君高臥青山上。定有茅菴結翠微。蕭縣聞當泗水亭。琴高曾此鍊真形。就令不作隨車雨。尙可追攀處士星。百里春風收驥足。一天夜月看鴻冥。攜尊更欲留君住。莫便沉酣喚不醒。

送同年高上桂之四川新繁任

錦城佳麗地。縣在錦城西。綠竹人家屋。紅橋野寺溪。大都無訟少。莫便以刑齊。倘有興人頌。吾詩付老黎。

挽洗馬史怵堂先生貽讓二首并序

史怵堂。余恩師也。戊寅余自浙歸蜀。補歲試。適公爲提學。從來補考。皆附三等末。獨余附一等。蓋破格也。科試又拔一等第一。獎賞以余卷遍示諸生。謂教官曰。吾考蜀三年。未嘗見一秀才。此生文字皆佳。方可當秀才二字。卽日送錦江書院。感恩知己。實爲平生第一云。

東宮推上選。西蜀仰文衡。一自荊州識。爭傳國士名。芝蘭薰蔣儼。華實羨劉楨。豈意都門外。旋看駟馬鳴。師將川任滿。我始浙中回。曾說三年考。方逢一秀才。錦江邀造就。翰苑復栽培。自愧空羣望。依然一老駘。

悼亡詩二十首爲妾萬氏作

漫說傾城絕代無。佳人本自出魚鳧。忽然物故真堪詫。豈是山精又武都。匆匆曾共觸霜風。拜別諸親月正冬。豈意竟成青塚恨。萬山萬水隔重重。六甲長愁怯弱身。幸能設悅更何嗔。昨宵一語真傷骨。命薄偏難產石麟。死去原知百物輕。香奩處處足傷情。更餘一事堪腸斷。愁聽呱呱索乳聲。情人前月寄娘鞋。手自縫題淚滿腮。此日郵傳知到未。可憐身已石芝埋。誤汝君臣藥不宜。竟無扁鵲一良醫。垂危對我猶強笑。想是肝腸欲斷時。

午夜扶持不暫離。可憐展轉遍牀帷。世間死亦無君苦。翻勸良人勿過悲。
誰能同唱復同賡。臨訣良言過友生。薄產較量粗足食。人生何苦住京城。
食則同案寢同床。幾曾一事不相商。絕憐到死無遺屬。執手猶言我不妨。
體佳曾記夏涼初。笑執經編問魯魚。小婢無知猶向說。綉簾拾得讀殘書。
月上紗窗恰二更。如何夢亦不分明。芳魂豔質歸何處。風動簾帷似有聲。
父母頻呼淚海傾。孝心真見出中誠。掌珠自幼親恩重。死去家書只說生。
當年七夕武擔山。聘得仙姬玉比顏。轉恨佳期當日誤。未聞織女在人間。
迨吉當年賦標梅。楊梯占得轉顏開。報他絡秀心中事。方幅聯姻許後來。
不少塗朱兩鬢鴉。剖心盡欲看無邪。如何猛雨朝朝有。易落偏逢是好花。
閨中何計慰愁生。鮮肉香腸佐一觥。憶得夜闌聞酒渴。隔窗催喚鳳仙聲。
桃葉歌殘思不勝。雨隨雲散太無憑。夜來斗室添涼色。誰送薰香半臂綾。
榴裙褶子是新裁。疊在空箱未忍開。今夜葳蕤渾不鎖。恐防怯冷攬衣來。
每逢春暮及秋朝。不是詩招卽酒招。始悔歡娛全誤却。兩年辜負可憐宵。
聞道身爲一聚塵。百年哀樂總非真。誰知痛到傷心處。和血詩成又示人。

題介石上人雲棧雪霽圖 圖爲同年周介亭筆

獨坐茫茫喚奈何。欲尋天女問維摩。上人要識題圖客。家在西川落鳳坡。
淡墨生綃萬點山。模糊雪片落林間。前年曾記嘉陵道。一笠衝風出劍關。
雪下文君沽酒家。無端碌碌走天涯。勸君莫寫騎驢客。我昔同車有舜華。
作如是觀真妙諦。鏡花水月卷中傳。此生已了空中色。只合長齋繡佛前。

雜憶詩十首用元微之韻

原無金屋爲君開。敢向仙源問渡來。憶得天台初入對。落花片片委蒼苔。
牽來一線豈紅絲。正是瓜瓢未綻時。憶得羞人呼不出。欲前仍傍繡簾欹。
歸寧幾日恨偏生。欲見無因借別名。憶得隔門通一笑。阿娘廚下已聞聲。
雁聲九月鎮相催。陌上香車緩緩回。憶得六親相見後。共傳攜得月娥來。
醒園家宴屆涼秋。白石欄邊俯碧流。憶得采菱分剝罷。鴛鴦來處一停眸。
艱難萬里歷關河。不使風塵浣翠蛾。憶得駝輿垂小幔。溫柔鄉比在家多。
三竿高臥日偏長。正值春雲捧玉皇。憶得歡娛長閉戶。早朝不羨侍中香。
冬來霜重漸支離。鎮日圍爐共酒卮。憶得裁縫京樣好。舊衣先遣試參差。
每因去住兩難時。萬種愁來亂所思。憶得閨中嘗勸說。長安久住豈非癡。
離家未慣亦人情。每聽更深出禁城。憶得病時長不寐。擁衾共話到天明。

題歸德太守趙檢齋房師詩集二首

漫說連膺五馬榮。當年四海入文衡。風流典郡傳蘇白。雲散升堂憶戴彭。昔年諸同門於趙雲松寓錢師出守。今雲松已歸里。鴈字題成雲五色。蘭花培就雨千莖。師有鴈字詩三十首。又有培蘭一章。最爲人傳誦。要知風化關心處。不在尋常課雨晴。

春風不坐十年多。雜沓門生奈老何。水部高名誰繼續。師自工部郎外轉。山公啟事竟蹉跎。蓴鱸秋思遲三月。琴鶴清風遍兩河。他日歸途親講席。要將白雪細賡歌。

周尤廷士拔自豐潤謁選來京冒雨見過四首

大雨正如此。君從何處來。十年饑渴慰。一夕笑談開。事過無須懣。時來不用媒。君看裘馬輩。袞袞盡登臺。憶昔初謀面。相留汝水濱。今朝重握手。如見故鄉隣。夜雨三聲鴈。秋風兩冢麟。君尊甫及余先君。皆已下世。回頭年少事。惟有涕霑巾。

睽離知幾日。老境忽相侵。交是貧時好。官從拙處尋。烟縈香畔榻。風動壁間琴。客禮何曾具。吾方醉未醒。阮籍狂徒爾。王戎鄙未捐。誰如喬梓繼。復見竹林賢。文字承先澤。功名定後緣。嗟余真薄殖。敢說授經鉛。尤廷有姪名冕。能文。欲從余學。故云。

哭金川死事趙損之吳鑑南諸人和程魚門韻

書生漫說樂從軍。萬骨堆成一將勳。飄飄魂穿深箬月。嶙峋尸裹亂山雲。空傳客裏登樓賦。愁聽沙場吊

古文剩欲請纓成壯志。無才祇恐負明君。

和襄城明府張雲谷邦伸見懷韻二首

結交不在廣。所貴同心蘭。我有斷金人。相思隔雲端。久而不聞香。入室空盤桓。朝來鵲送喜。有客來河干。探懷出手書。爲言觀面難。人生非有他。造物偶控搏。隨地走四方。險歷爰與垣。火鼠自趨暑。冰蠶自趨寒。所趨雖各殊。無非謀一餐。我昔來京師。所願一識韓。文章非老成。亦尙富波瀾。翱翔附青雲。和聲效鳴鑾。豈知垂天翼。終爲尺蠖蟠。雖未終朝褫。已殊占錫鞶。所以鬱居此。白晝常鮮歡。今君復見慰。祇益羞顏丹。會當拂衣去。躍出塵漫漫。寄語藪澤人。寥闊看飛翰。

仲尼昔反魯。援琴操猗蘭。乃知雖聖人。亦自多憂端。我少讀春秋。篇未終隱桓。芥視青與紫。謂祿便可干。無梯可上天。始知寸步難。袞袞看諸公。萬里爭鵬搏。卑飛笑鸞鳩。安望高及峘。碌碌走塵中。誰憐賤子寒。甚欲焚筆硯。恐因咽廢餐。窮愁學著書。又甚卑申韓。雕蟲雖小技。尙可挽狂瀾。君看太白後。誰無慙金鑾。坐令英髦輩。俯首目屈蟠。知命故不憂。斯言可書顰。感君屬望意。愁懷愈不歡。已除散仙籍。安望大還丹。回首望故鄉。雲水何瀾漫。秋風昨夜動。我欲師張翰。

農部徐惕菴尊人玉亭先生以新繁令籌餉金川至木果營遇難惕菴聞信卽素衣向西慟哭將萬里至蜀尋父屍臨別出詩數章見示余故與玉亭訂交甚契前年辛卯秋余將至京猶及見於成都邸舍詩酒往返十餘日今追憶之赫若前事而其人已往曷勝愴然因和其詩元韻以誌別並輓玉

亭

白馬秋風去帝城。旗亭話別一樽清。大忠不覺從軍苦。至孝翻悲死節名。血酒寒山鵲是伴。骨留荒礪草難生。因君至蜀尋消息。我亦悽然動別情。

前年錦里葉初飛。曾別先生上帝畿。好友常歎如鳥散。依人每笑似鷹饑。卽令舊雨誰青眼。自古浮雲總白衣。多少故交零落盡。故園何日賦烹微。

偕同司程魚門王鎮之馮介亭孟蘭洲王曉莊劉綱齋盧閬峯方廩堂梁梧岡飲曹長吳樹堂我堂羣賢畢集我堂東。四面圖書映畫櫺。九月天逢楓葉雨。一時人醉菊花風。主能投轄情何重。官訝恩波迥不同。好與諸公相努力。玉珂及早響璫璫。

童山詩集卷十五

甲午上

答王梅溪怡問詩

岳聳須如岱。江源要倒峴。四時春日好。萬象夏天新。格調宗唐律。杼機採宋人。大都先忌俗。乃可望清醇。

送湯緯堂

大業同年之德清

捧檄東南去。多君咏白華。故鄉饒橘柚。新色帶蒹葭。吏散堂前舞。農忙陌上車。響溪山水窟。合遣付君家。

張雲谷同年寄書聯姻

從來四三說張李。二姓原宜互結姻。寶穀不須圖孔雀。徐陵早決石麒麟。地無遠近惟君好。天有盈虛恕我貧。若道同心金必斷。雷陳方許作朱陳。

挽大司寇錢文端公

陳羣

三朝眷遇老成身。顧養林泉二十春。秀水文章名似斗。香山圖畫髮如銀。簡濤世掌三公職。錢沈齊名兩老人。豈謂忽翔雲外駕。傷心驚見卹恩綸。簪纓不少聖明時。誰似詞章結主知。御製驪珠頻寄和。迎鑾龍舸每教隨。自慙才豈籠中物。偏許天從管

裏窺我是歐陽最遲弟。瓣香獨自感恩私。

記得嘉禾侍起居。趨庭剛是學詩初。吟成蠶繭鬚眉喜。引近臯比講論徐。一棹鴛湖春載酒。幾行鵝帖夜

臨書。自從忝竊蘭臺選。清夢時猶傍草廬。

一別春風不與遊。人間無路望仙舟。昔蒙國士曾青眼。今作郎官欲白頭。篋裏卷餘朱筆抹。壁間字尙墨痕留。平生亦有西州慟。不是羊曇淚總流。

送皖城司馬錢蔭齋汝恭以艱回浙

盧溝橋下送縷衣。立馬橋頭涕泗垂。身是世家難作吏。人因名士遇偏奇。雲高櫪馬猶呼伴。風猛林鴉不戀枝。聞道皖城好山水。他年與爾結茅茨。

送別王梅溪之杭州

見說東南勝西湖。我舊過繞山僧寺出。傍水酒樓多。夜夜聞絲竹。人人總詠歌。王喬本仙令。定有好詩哦。

奉和粵東中丞德定圃座師見寄元韻

登龍曾憶滿京華。桃李逢時盡作花。孝伯亭亭慙直上。癸未科師充大總裁。閱四川卷。調首蒙擊賞。拔置會試第二人。孔融小小亦通家。十年不立門前雪。萬里常看海外霞。今日讀書似親炙。春風疑不在天涯。自知入室未升堂。濟濟容隨吉士行。偶借青藜近燈火。公然絳帳聽絲簧。郎廳此日偏依鶴。學博當年笑擇羊。調先以國子監學錄。釋褐受知故云。屈指平生知遇重。鳳鳴終自愧朝陽。

道德門依鳳闕間。年前入覲暫來還。春容近接三臺象。風化遙靖百越蠻。慧苴囊開無別載。木棉花發又重攀。珠江可許陪趨步。飽看羅浮月一灣。

帝咨柱石爲寧邊。八座文昌內簡賢。人頌恩威恩最著。羣歸教養教尤先。陶延名重溪猿伏。韓愈文成海鰲遷。難沓最憐門下士。幾時重入醉翁筵。

奉命典試粵東再疊前韻寄呈定圃座師大中丞

南交火位炳文華。何意微名署五花。各省試差。例由中書票簽請旨。時五省之命。同口俱下。手執弓旌原爲國。心欣衣鉢得傳家。三年坐憶談風月。六月行看趁晚霞。師友一時皆遇合。主恩真是浩無涯。

子固文從六一堂。當年指示得周行。舞來鳴鳳皆諧律。吟出雕蟲似鼓簧。天使絳紗仍侍馬。人傳綏帶實過羊。諸生欲識淵源自濯漢。應知並暴陽。

海山一氣杳茫間。萬里迢遙記往還。自古文人寧有種。只今聖化不分蠻。後生雨澤恩皆沐。前輩風流盡可攀。好向龍門爭鼓浪。窮源槎只在河灣。

同駕輶車下日邊。持衡嶺嶠愧非賢。敢云楊炯居王後。正試爲青陽王公懿修。常笑劉琨恐祖先。驛路公程爭夜趁。郵亭詩興逐時遷。囊中各有皇華詠。待正吾師瑋瑋筵。

六月初六日出都是日。福建典試編修湯辛齋先甲。同部王曉莊元燮同出都辛齋與春甫同官。予與曉莊同官而皆出庶常故詩中及之。